



27. april 2007

Inatsisartut Suleriaasissaanni § 36 imm. 1 naapertorlugu Naalakkersuisunut apeqqut imaattoq saqqmuniarpara:

Ilinniagaqartut Danmarkimi ilinniartitaanerit marluk akornanni inissisimatillutik atugaat pillugit Naalakkersuisunut apeqqut.

(Inatsisartunut ilaasortaqa Astrid Fleischer Rex, Demokraatit)

Tunngavilersuut:

Ullumikkut imaappoq Danmarkimi ilinniartortavut ilinniarnerminnik naammassigaangamik Kalaallit Nunaannut uternissaminnut akiliunneqarnissaminnut pisinnaatitaasarlutik.

Aammattaaq ilinniarneq aallartinneqassagaangat Danmarkimut angalanermi akiliunneqartarneq taamatut pisarpoq.

Malittarisassat taakkua soorunalimi Demokraatinit tapersorsorluinnarneqarput.

Taamaattorli ima pisoqartarpoq malittarisassat siunertamut naleqquttuusaratik aammalu eqaanerusumik ingerlaqqinnissaq eqqarsaatigineqartariaqaraluarluni. Tamatumani pisartut marluk eqqarsaatigaakka, tassa ilinniarneq tunngaviusumik ingerlaqqiffiugaangat aammalu pingaarnerusumik ingerlaqqiffiugaangat. Matumani tunngaviusumik ingerlaqqinneq namminersuutigalugu ilinniarnertut isigineqartarpoq. Pingaarnerusumik ingerlaqqinneq tunngaviusumik ingerlaqqinnerup naammassineraniit qaammatit marlussuit qaangiunnerisigut aallartikkajuttarpoq. Piffissami tunngaviusumik ingerlaqqinnerup naammassineraniit pingaarnerusumik ingerlaqqinnerup aallartinnerata akornanni kalaallit ilinniagaqartut SU-mit tapiissutinik pissarsisarnissaminnut periarfissaqanngillat, aningaasannorlugilluunniit ikiuutinik pissarsisinnaasaratik.

Akerlianik kalaallit ilinniagaqartut Kalaallit Nunaannut angerlarnissaminni Danmarkimullu uteqqinnissaminni akiliunneqarnissaminnut periarfissaqartarput. Angalaneq taamaattoq – apeqqutaatilugulu Kalaallit Nunaanni sumi najugaqarneq – 10.000 kr.-it 30.000 kr.-illu akornanni akeqartarpoq. Aningaasat taakkua ataatigut atsiortunga isumaga malillugu piffissat ilinniartit taakkua akornanni piffissami ilinniartup pitsaanerusumik taperserseqarnissaanut pitsaanerusumik atorneqarsinnaagaluarput, ilinniartuq tapiissutinik allanik pisinnaatitaaffeqanngimmat.

Ilinniartortatta ilaat Danmarkimi ueqarlutillu meeraqarput. Taakkua soorunami piffissami ilinniarnertit taakkua marluk akornanni Kalaallit Nunaannut angerlarnissaminni ilaquttatik qimakkusunneq ajorpaat. Taamatut pisoqartillugu Namminersornerullutik Oqartussat tungaanniit eqaanerusumik periaaseqarnissap takutinnissaa periarfissaqartariaqarpoq.

Qulaani taaneqartut tunngavigalugit Naalakkersuisunut imaattumik apeqqutissaqarpunga:

Naalakkersuisut eqaanerusumik ingerlaqqinnissaq isumaliutigerusuppaat malittarisassat imaalillugit, illiniagaqartut aammalu Kalaallit Nunaanni inuiaqatigiit aningaasanik iluaquteqarnerulersillugit tamatumalu peqatigisaanik inuit pilluarnerusut isumakuluuteqannginnerusullu pilersillutigik?

Apeqqutip tiguneqarnerminiit ullunik qulinik piffissalerlugu akineqarnissaa piumasarineqarpoq.